

漫

谷九

亭

集

漫叟亭集卷二十九

壽陽祁騫藻叔穎

古今體詩六十八首

丙午至  
巳酉

雨中早起

昔愁苔及榻今幸瓦爲衣  
破睡猶聞雨招涼故啟扉  
樹分鄰影密車過市聲稀  
側想雙橋路谿流沒釣磯

種竹

閏五月十二日

移花劖土幾番忙窗北仍憐徑  
就荒竹醉日難逢夏閨琴  
眠陰欲借秋涼疏風勝入簞  
簞谷密雨休侵薜荔牆  
便與新居添故事年年食筍似江鄉

題馮孝女墓銘

監利王伯心撰番禹陳官蘭書  
孝女展雲編修譽驥之姊

焚香割臂豈求名孝不能旌孝更誠莫道墨華惟一見慈  
雲長住五羊城

彤史它年表女儀鏤冰刻玉有餘悲金陵片石瓊州筆一

樣流傳絕妙辭

唐氏孝女墓在金陵張  
深山前輩爲書志銘

王蓬心浯溪讀碑圖追次夢樓韻二首爲許滇生尙

書題

鄭虔三絕總堪憐能使江山落眼前披卷盡如親歷處

奉使湘中有  
游浯溪詩

勒碑猶憶中興年書齋舊雨持相示畫舫清

風信有緣記否西園論翰墨於今霜鬢對雲煙

風流太守重交游千里題詩感素秋

蓬心寫寄  
夢樓題句

自是宦情

同漫叟不關家學羨營邱筆端亦有金剛杵坐上應無寒

真油便擬與君成小隱此中祇合侶羊求

老將

老死承平世身經百戰場麒麟圖具在薏苡謗何常病馬  
思羈勒飢鴻託稻梁男兒信慷慨亦復可憐傷

讀詒晉齋詩集

選理精研練詩裁出性情骨存杜陵老神奪玉谿生爲善  
能行樂遺編豈近名三長誰品次吾欲質諸城

劉文清公嘗自謂有

三長詩爲上題跋次之書又次之成哲親王詩爲書掩故世人知之者稀也

七月望夕還園居

幽居隔市闌偶出不知還水住橋邊月雲移畫裏山秋陰  
橫碧嶂暝色上銀灣歸路荷鐙外園扉靜未關

丙午主試順天秋闈用聚奎堂王衷白先生

圖詩韵

呈孔修大司馬元修少宰

過眼雲煙歲月深春關秋賦許重臨

辛丑春關典試迄今六載矣

曾陪

上閣鵷鸞侶又接西園翰墨林子建未須辭潤飾君平何必問升沈

天題仰矚奎垣近堅白相期勵寸心

是科首題不日堅乎四句

孔修元修見貺和章次韵奉荅

一行雁字覺秋深

詩題一行斜字早鴻來

屈指重陽節又臨抱璞漫

云能識玉種花敢道已成林同岑臭味神先契滿坐吟哦

氣轉沈三十年前泥爪在風檐應許證初心

寄海門郡丞周竹谿七兄

維新

栖霞山影秋橫江短篷燈火風搖窗手披畫卷銜酒缸題  
句尙記維舟樁八載一別心旌撞樓臺振氣銷戈縱海門  
地迴波濤淙漁丁沙戶無吠厖士習俎豆民耕耜頌聲萬  
口盈吳艘尺素報君江鯉雙祝君壽考顏豐龐他日報政  
來南邦園扉更喜足音登

竹谿今年政七十  
同人寄詩爲壽

劉文清公書頭陀寺碑文題後

司議工書世罕傳頭陀碑法久茫然米家枕祕無人覺卻  
恐飛騰讓後賢

孫退谷庚子銷夏記歐陽元云近代米元  
章書矯亢跌宕世咸稱其自秘一法不知

其全學東之頭陀寺碑耳元章祕而不言以陸  
書少傳於世也文清此卷駸駸乎度越驂駟矣

休論野鷺與家雞肥瘦紛紛誤品題池水墨痕都不著故

應傾倒庾征西

金陵何大司馬太夫人五世同堂親見七代壽屆九十  
十新正吉日蒙

恩賜

御書扁額錫賚優加賦詩奉賀二首

慈雲高護侍臣廬拜舞

龍章出玉除春雪六花天下瑞仙萸五葉

禁中舒

上方絡繹頒文綺

前席頻番問起居四十年來徵盛事

恩榮直邁宋尙書

五代同堂特蒙 恩旨自嘉慶十四年京兆宋公後於今再見

九旬壽母七旬兒一品萊衣爛漫披仙樂共聆朝退後春

擘偏愛日長時同廷感慶

恩膏及

溫旨喧傳道路知更喜泥金書澹墨雲仍繞剡祝期頤

教忠篤慶詩

并序

道光二十有七年正月兵部尚書何公之母既以年

躋九旬蒙

恩賜壽於是

上命樞臣傳詢中外文武大臣有老親年屆八十以上者悉列以聞時則協辦大學士吏部尚書陳公母壽九十都統祿公浙江巡撫梁公母壽均八十以上咸拜



恩賜惟我同年工部尚書濱州杜公躬侍庭訓道秉  
義方尊公光祿大夫石樵先生以侍郎致仕今年八  
十有四

兩朝耆舊三世清華特荷

褒嘉式於有位美哉雖古所稱香山洛社諸賢遜斯  
榮遇豈特魯侯燕喜詩人善頌而已嚮藻年家末學  
幸與稱觴不揣固陋撰詩一篇敬釋

御書教忠篤慶之旨用述養福致壽之徵以引以翼  
有繇來也其詩曰

蕩蕩壽寓穰穰福祉五臚告備百昌咸理惟

聖母壽壽我

天子惟

天子壽爰及卿士番番黃髮欣欣壽母

德施既普錫類孔厚爰咨司空服官祇敬父教之忠

帝篤其慶其教惟何明道正誼東序授書正卿贊治克承厥家不解於位其教惟何貽厥孫謀蜚聲騰實競爽交修何以篤之俾壽而康中春初吉載錫之光何以篤之俾熾而昌元日令辰載弄之璋福以壽增壽以福致積爲家慶蔚爲世瑞煌煌

御書光逮臣閭良玉文綺溫如爛如光祿拜前尚書拜後宮庶太史扶掖左右三世一堂輝映組綬闡城溢郭道路歡譁僉曰盛哉忠孝之家

天子日俞求忠於孝臣拜稽首臣父之教臣父戴

恩率子暨孫祝

天子壽祝

聖母壽億萬萬春壽筵肆設同廷拚舞銘鍾勒鼎徵今稽  
古清風作誦以儷吉甫

題汪良山侍讀

振基

執硯圖

君昔持衡莅三晉氣凌恒霍風裁峻揮翰羣迎玉署仙歸  
鞍早策金臺駿豈知遺澤在高門祖視曾傳范伯孫汾水  
澄泥都不弃崑山片玉本來温自從綵服還鄉里一滴蟾  
蜩照潁水白華朱萼壽觴前寶炬雕盤清夢裏劇憐青鐵  
付張華博物空陪第七車磨人歲月無裨補爭似經帷侍

絳紗

爲董醞卿農部

醇

題篝燈課讀圖

農曹邦之彥七載忝同志去年使津門鹽筴藉闕議

丙午歲六

月余與孔修尙書奉使天津君以司員同往

今春又繼往倉儲正多事漕缺待

海販杭稻雲帆至簿書迫草劔經畫歸簡易

頃從靜濤少農赴津籌辦

采買商米事

瀕行手一冊屬我爲題記闔門想燈火慈訓述光

懿煌煌門與閭上有

天題字軋軋機與杼中有阿母淚短檠聚秋影高樹散涼

吹如聞金石聲淵淵出空翠豈知下帷人窺園並無地桐

柏千里流甘棠萬家庇

君居邵伯湖上

邵南偶隱居謝公乃循吏

賢良策已效劬勞念所致憶當

旌表初幸備輪軒使

戊戌歲太宜人

旌表

來往淮揚間

采風久延跂此圖今在眼展仰識微意苦節報春暉名儒

期上治君歸自渤海吾欲問龔遂

觀明沈文端

鯤

手書冊感歎題後

耄老無忘抑戒篇訓言猶識馬文淵貶泉貝錦工何益十  
事焚香已告天

朝議紛紛漸不支家書懇懇有深思角巾東路尋常事難  
得精誠動主知

送星泉將軍之官福州

自從西旅事戎旃身作長城志益堅投筆早聞班定遠據  
鞍今見馬文淵大江比歲仍防險滄海無波要得賢

君由兩江

總督入覲再  
出爲將軍 垂老勲名照南國

聖恩未許卽林泉

詩書易象有家傳

尊公泰菴先生著述甚富

夷險生平總豁然豈獨巖

關能禁蹻定知武庫善籌邊  
七閩坐鎮先聲在萬里行看  
使節旋早晚

龍光三晉接不須尊酒悵離筵

寄舫

并序

此余爲何雨人題園居齋額也  
雨人南歸此齋遂爲  
吾鄉京宦別墅仍書舊額并系以詩

畫舫齋前任醉哦園林風雨喜重過  
塵心未用思鄉縣已  
覺雲山北向多

冬蠅

窗間十月蠅擾擾尙飛騰未忍頻揮塵非關可語冰飴盤  
吾自媿擇肉爾猶能時節鄰霜雪韓公那用憎

聞喀什噶爾英吉沙爾二城解圍喜賦

疏勒城頭月依然照漢營幕開烏鳥樂塵靜鼓鼙清撫馭  
紆長策艱難罷遠征安西問都護早晚及春暉

道光二十七年七月二十二日邊城回匪滋事 命參

贊大臣 奕山 統兵自伊犁越冰嶺往援九月二十八日

十月一日英吉沙爾喀什噶爾先後解圍賊首竄出卡  
外 詔書寬大不令窮追是役也戶部撥帑金幾三百

萬定西將軍 布彥泰 未出關而事定

道光六年逆酋張格爾俶擾四城揚威將軍討平之十年小蠶旋定及今凡三有事矣

并記

長兒母服初除作詩示之

丁未歲十二月三十日

除服逢除歲門庭似覺春愁看霜鬢改忍著綵衣新返哺  
恩常念傳經意獨親及時須努力家訓要書紳

戊申歲正月二日

上以元日晴明豐年兆象 嘉獎耆臣 錫予優渥洵曠

典也恭紀

天顏有喜拜

恩多元日朝回想玉珂

盛世君臣齊壽考豐年雨雪總調和叨陪樞禁論思職許



聽康衢擊壤歌并載簪豪無寸補卻慙頭白對鑿坡

大學賜

士潘世恩太傅紫纒時年八十賜大學士實與太保尚書保昌阿勒清阿李振祐左都御史成剛太子太保均年

七十以上

送閩甥

國輝

歸省

正月十三日

吾姊行年正六十吾甥歸省及初春雖貧自有家庭樂漸  
老難忘骨肉親緘字分明如對語寄衣長短欲量身鏡前  
若問京華事但道輕霜點鬢新

實甫少司空招飲觀豐稔圖

并序

屋五楹南北窗以西二楹爲圖薄板上下各五層上  
接承塵畫以雲氣下安地平雜寫村落屋宇人物稻  
田每層相距一二尺或三四尺前後高下準以綫法

最後西牆懸畫一大幅山水平遠樓閣參差帖水小  
舟橫空雅陣咫尺中有數十里之勢不用洋鏡攝取  
幻影自然深遠洵奇觀也製者大興姜學詩題曰豐

稔圖

春江綠漲波連天中有短篷雙畫船紫紅漾碧清且漣遙  
山倒影樓臺懸寒鴉幾點明夕煙飲犢兒童橫背眠敲岸  
偶有漁竿牽穉稔萬頃開平田溝塍刻鏤秧鍼穿茅舍枳  
籬谿路灣男畊婦織咸怡然酒人圍坐村柳邊似聞懽笑  
聲喧闐今年米賤不論錢短衣躍馬何翩翩控轡欲馳神  
則閒將毋招客導以先水光雲氣相盤旋日腳四射天爲  
圓目不能極情屢遷祇恐畫筆無由傳壺公一壺瀛海寬

徑欲跳入窺其全主人謂客且莫喧方今佳節鄰上元邊  
庭無事銷戈鋌冬雪既渥春鐙妍觴詠樂不煩管絃吾輩  
置身圖畫間得魚不知仍忘筌世閒何處求神仙豈必更  
羨桃花源桃花一實三千年年豐人壽如彭篋請爲主人  
醉此筵報章卻媿瓊瑤篇

練余心齋蓋取蔡中郎琴歌練余心兮德惜惜句意  
曾屬田季高書額頃於故紙堆中檢得二十餘年筆  
墨如新題付長兒藏之

澄懷舊雨想苔岑一紙留題託素琴付與兒曹須護惜卅  
年如見故人心

三月二日喜雨二首

寒煖總無定清明上巳天向來望春雨難得似今年紅溼

看花鴨青勻想麥田東風還有意吹送直沽船

海運漕米一百十餘

萬石已由吳淞出口至崇明十墩候過二月八日風信放洋北上計日可達天津

春雨已終日春雷應一鳴恩威時並濟寒煖氣俱平更覺

園扉靜遙知

輦路清

時將隨扈

滇池煩洗甲萬里各陰晴

雲南永昌漢回構畔林少

穆制軍赴大理督辦

題李季雲侍御

恩慶

平谷山莊圖

坐擁雲山亦快哉移家何必起樓臺他時誰續盤陰志記

取龍眠招隱來

鄉心飛度碧嶙峋萬壑松濤洗客塵著我幔犢亭子裏相

看都是畫中人

題張石州煙雨歸耕圖

我昔耕田古馬首農書一編常在手卽今委身錢穀中司  
農媿不如老農鬢髮蕭蕭已如此讀書事業可知矣何怪  
思歸張季鷹鄉心不待秋風起君家縣蔓水我家漫犢亭  
溪聲與山影百里如戶庭荷鋤者誰似相識胡爲箸書苦  
心力一笑眞成笠屐圖片雲已逐雙飛翼冀缺歸耕孰饒  
田梁鴻賃廡轉悽然余與石州皆有騎省之悼何時共策烏犍去老向  
桑麻社酒前

鶴舫相國以篤藻曩歲省親歸里續請展假手書相

示感賦二首

一紙陳衷曲回思十九年別離因念母呼籲竟通天  
盛世包容大春暉覆照偏手書荷存錄感舊獨潸然  
自分縣田隱無緣洛涖居

賜書邀

特筆

竊藻請假在籍  
職圖故事

恩賜御製文初集並平定回疆  
賜書由樞臣列名進上兩次均蒙

筆添注臣名  
頒賞洵異數也

闕奉安輿再造

君恩重中年宦意疏卽今霜鬢改染翰欲何如

唐榻張長史書郎官壁記序題後

劍氣縱橫未易馴每於顛草見精神細看運腕藏鋒意豈  
似濡頭爛醉人古紙餘妍香入室靈巖祕賞靜無塵臨摹

合付銀鉤筆千載猶存判牘新

伯高以草書得名獨郎官記乃真書世鮮搨本介春

協揆所得王夢樓跋云是靈巖畢氏舊藏斷爲唐搨不知卽鴻堂所刻王敬美家本否

題張文敏臨顏書論坐位祭姪文二帖

天瓶大筆冠時英心畫從來見性情太學一碑留典則平原兩帖更縱橫若教

寶笈編摹入定付貞珉搨本行珍重玉虹題字在南張北孔合齊名

題錢直卿

師璟

誦芬圖

江左推家學名門孰比倫采風久延跂遺像見精神恍與清芬接何緣講畫親禮堂經史在寫定有傳人

直卿嘗撰嘉定錢氏

藝文志附

黃榘卿少司馬琮歸養滇南寄懷二首

萬里榮歸日雙親老健時口銜

溫旨出心逐彩雲馳盛事堪圖畫羣寮動歎咨遙知春酒  
熟萊舞看兒嬉

憶我還鄉里經年轉國門陳情容再瀆就養荷

殊恩老羨天倫樂交期古誼敦鼎鐘兼菽水獨許慰晨昏  
已酉新春澄懷同直枉過寄舫戴鹿牀侍郎熙寫竹

留贈題二絕句

雲山別墅三椽屋坐對森森碧玉簪傳語鄉人勤護惜居  
然竹箭北東南

剡谿乘興能摹寫  
八角槎枒生面開  
從此吾廬雪色壁  
紗



龍還有好詩來

葉亭圖爲葉棣如閣學

韻集題

自我來園居前後將二紀衡宇六七區牀竈隨所徙有如

春社燕相識皆舊壘池南余再居徑窄橋欲圯橋西賸破

屋廢爲馬廐矣君初來卜宅仙李適鄰比

鐵梅侍郎

相顧度地

勢灑然心獨喜扇湖千頃煙瀉入銀灣水小阜雖不高西

山躍而起君曰宜築亭亭成客戾止鄰翁舉杯賀謂與柯

亭似勝境今特剏嘉名昔所企余時辭園廬雙橋隔淀市

退直輒過訪楹句曾留此

拓將屋後三弓地放出湖西一角山前年題句也

錢唐

雨仙客圖記各擅美

戴鹿林畫沈朗亭記

冲澹忘俗緣奧曠挾精理

澄懷多舊雨盛會繼前軌賤子幸追陪室遠心則邇緬思

八友圖風徽存杖履

乾隆丙子歲漳浦蔡文恭公以少司寇乞養將歸纒懷石交圖其同直七

人合爲澄懷八友圖八友者介休梁少詹事錫瑛錢塘周學士玉章會稽周學士長發武進程少司馬景伊安州陳副都御史惠華無錫張稱修泰開長白少司馬觀保嶽州汪文端公作記武進劉文定公又仿少陵體作歌越九年甲申圖中人惟無錫張公仍內直其七人或遷或歸至是陸續入直又得七人則星齋陳公海住金公文園李公抱經盧公金圃謝公敬堂倪公曉園汪公也

古藤華尙垂新翠竹堪倚年豐官事

簡海隅若鏡砥茲亭信可樂觴詠從此始

題何子貞編修

紹基

延年益壽瓦當文用蘇齋韵

我藏蘇齋大觀本細字攷覈標分篆自云得之壬寅歲晉觀作堂手題扁持示東洲老居士如懷珠玉待精選居士一笑出此冊物必有偶互流轉此亦蘇齋壬寅物報君雅意媿不腆後先珍弄若有緣五十之年皆大衍瓦文四字

何吉羊宜爲高堂祝福馘賦詩更爲居士壽金石刻畫追  
蹟典故訓頻將奧義搜豪情不用腴辭翦鯁生才薄思苦  
澀臂痛廢書猶勇勉蹉跎敢和石鼓歌放悲如親漢宮宴  
碑板何如古甌瓦阮公好古言誠善儀徵相國嘗云好舊碑板不如弄古甌瓦  
蘇齋二寶試衡較我當避舍甘懷卷

題元修少農郵行詩草

兩卷珠璣二百篇都將豪興付征鞭直從趙北燕南地吟  
到吳頭楚尾天煙樹影餘梁苑古金隄功溯漢臣賢諷咨  
別有關心處可似詞曹奉使年

徐方南下接姑蘇六代江山擁畫圖水落蛟龍初徙宅秋  
來鴻雁尙銜蘆高歌不覺風生腋歸思渾忘雪載塗曾到

退之詩句裏舊游清景許追摹

伏日退直述懷二首

溽暑緇縕氣上升先秋三日轉炎蒸無情祇覺林蟬鬧不  
寐時聞攄馬騰南國橫流安有極北窗危坐欲何憑明知  
寒煥非人力膚汗侵衣尙語冰

聞道鯨鯢靜海堧那堪鴻雁散江天露臺自惜中人產雨  
粟誰分大造權比歲瘡痍猶未復一時撫字正須賢區區  
仰屋曾何補不獨流亾媿俸錢

七月四日蒙

恩以戶部尙書協辦大學士恭紀

樞垣密勿近

丹墀九載承

恩已不貲分職金倉慙會計仰瞻

雲日懷疇咨才疏每慮愆尤蹈守拙常懷盛滿持

宵旰殷憂時正切平章何以備參知

吳姓舫少宗伯

鍾駿

屬題游雁蕩圖適再奉

命視學浙江卽以贈行

我昔流觀雁蕩圖瀑布之奇天下妙及聞思補老人語

芝軒

夫子嘗言此山瀑布得金鼓聲勢更盤紆

乃歎畫工筆未到仙山隱見若有緣

後境豈必前蹤導亦如榭栢與蘭茝搜采旣盡光始耀靈

巖龍洞世罕窺似與天台爭冥奧沈公遊後徑漸闕近者

朱文定

李芝齡

尚書詩特陪先生說山如說士相賞在心不以

貌篋興肩頰屐齒折輒於佳處領其要歸來寫圖爲題句  
清夢五年頭屢掉桃李門高今復開珊瑚樹大昔曾釣豈  
惟多士久延跂定有山靈暗相召今劉阮笑古劉阮前輩  
風流資嘯傲阮芝臺劉金門兩先生  
會同游天台刻石賦詩看君更賦第二圖收  
攬奇觀凌海嶠

題張石州小栖雲亭圖

荐雷書屋十柏堂昔程侍郎爲君篆栖雲院古亭名新繚  
緲家山何處扁谿聲山影落窗枕勝地從來待人選舊宅  
猶存三徑荒遠游且逐孤蓬轉歌成金石獨慷慨坐擁圖  
書極精腆昌平山水天下奇靄橋數畝何平行爰卜佳兆  
老復丁天之所篤俾爾戩輞水爭誇別業圖草堂不用春

衣典嘯臺遺址似陽泉鄉夢如雲不可翦嗟余與君共州  
里遊宦歸心都未免漫徂亭接縣蔓水結伴登臨尙堪勉  
胡爲栖栖感羈旅白首著書不遑宴君看妙畫徑飛去

前畫

已失此第  
二圖也

造物相憐意殊善杜陵歸老桑麻田它日詩書

應漫卷

石州所居陽泉山莊園林池館據吾州一  
邑之勝元遺山詩陽泉舊院卽此地也

題家靜齋學博三兄鍾飼鶴圖

析津奉使記前年客館相逢喜欲顛小別時煩雙赤鯉冷  
官猶擁一青氍詩書世守研經訓風雨人思對榻眠看取  
畫圖行樂處知君氣已養胎仙

漫流亭集卷三十

壽陽祁駕藻叔穎

古今體詩六十三首

己酉

十月二日奉

命使蜀敬紀

奉使初冬已戒寒客星遙向益州看卻瞻馬首鄉關近

驛程

適過壽陽擬差旋請假埽墓

漫說蠶叢蜀道難樞省正歌雲縵縵驛亭

重對月團團頻年農政慙無補得效馳驅敢自安

留示六弟

市月遷除兩拜官

七月擢廣東都轉九月遷臬司瞻

天計日近長安老思兄弟團圍樂



恩重

君親報答難雁陣回旋如有意鴻飛蹤跡本無端

弟於十一月計

可來都而予適出使道經

鄭縣恰得與三兄晤聚莫因聚散增惆悵努力雲霄路

正寬

良鄉行館

小雪過三日皇華第一程同人占野獲

鍾石帆董醞聊兩農部馮曉滄比部

同行大有喜秋成

中禁衛

恩出西山導客行太行雲滿眼已有故鄉情

定興河上懷古

朝發涿鹿城莫息督亢水川原曠遐矚林木連雲起有懷

擊筑人慷慨悲燕市劫秦雖不成荆軻亦壯士至今易水  
上寒風射眸子古人重義氣成敗非所擬高歌動白虹祖  
龍魄已死矯矯駕部公楊椒山先生祠墓在墟里當其劾權奸  
豈不識利否延年一按劍漢廷肅綱紀奚用死灰然始信  
冰山圯忠俠道攸殊趨義惟一軌古人不可作臨流淚爲  
泚

涉唐水過定州宿新樂縣

雨水滌洞合

唐水與滌水合流

嘉山潑眼明樓鄰西樂里

漢中山孝王爲

其母作樓閣故名

地近曲陽城驛路浮沙遠雲陰釀雪輕春風亭

畔柳

元侍郎蘇天爵亭在伏城驛南蘇村

好與約歸程

定州行館見程春海侍郎前輩楹句云編枳籬環紅

躑躅團蕉屋倚碧琅玕蓋中年書也感作

澄懷花竹有前緣退直歸來兩散仙猶記奉觴行樂地好

雲圍坐日如年

侍耶曾贈余聯云竹笑蘭言慈母堂前愛日永鶯遷燕賀高賢坐上好雲多蓋彼時

兩家太夫人皆就養園廬也

儒雅風流筆陣雄後生誰敢薄雕蟲禮堂幸有傳人在寫

定終歸鄭小同

公子卒遺一孫進官今年十歲頗聰穎

遺編每讀感心知多半元和贈荅詩

余與石州子貞諸君哀集侍郎遺稿刊行

今日中山山下客爲誰惆悵立移時

伏城驛

誕降神靈地流傳事有無天將開混沌道必洩苞符佳氣

鍾恒嶽祥雲接慶都似聞龍馬出明月擁河圖

蒙古語正月十六日

謂之龍馬出世書傳不載重譯  
得之亦奇聞也賽鶴汀司農說

### 入山

不謂滄沱水西流送客回雲山千萬疊心目一時開夢境  
明明是鄉音漸漸來翻疑釣游處豈有簡書催

### 曉發獲鹿過井陘宿胡桃園

斜月在天霜氣濃土門壁立無煙烽與人指點尙能說抱  
犢海螺青數峯

七里瀧舟如紙鳶一人一綫隨風牽篋輿載我井陘口夢  
裏分明上瀨船用繹行

小釜飼雞雞亂啼大釜飲馬羣馬嘶物情貴賤那可料黃

金掖垣鐵制笄

金多陶樂民人范摶以掖垣鐵鮮猶  
魏帝后製笄以飾首見酉陽雜俎

嵯巖石炭走騾綱不斷鈴聲替戾岡黃土搏人沙作器欲  
從遺竈問媧皇

清流瀲灩激沙壩水磨人家傍麥田絲水自來人自去客  
心何苦更纏絲

龍窩寺底老龍眠龍洞幽深別有天但願興雲作霖雨莫  
教餘怒決平川

入平定界

傳聞星使有輝光父老欷歔候路旁共道板輿曾奉母於  
今旌節又還鄉停車暫憩重關月攬鏡空慙兩鬢霜爲報  
殷勤相愛意石田茅屋未全荒

石門口

樓閣倚山顛登臨一豁然高齊碑可讀僞武字空鐫石筍  
忽孤立厓松多倒懸靈風如戒客雪意逼寒天

宿平定西關

下馬入門鐙火親旅人卽次如歸人連山占象得婚媾永  
夕留歡兼主賓感君翦蔬載尊酒念我攬轡馳風塵秦關  
蜀棧未云遠請看天涯猶比鄰

壽陽郭外與三兄別

懸車出石艾晨光猶熹微行行壽水陽暝色棲林霏邑侯  
喜我來城郭羅旌旗鄉人喜我來奔走如脫鞵下車拜阿  
兄未暇整行衣兄曰吾見汝但恨目力希攬袂一握手有  
淚不忍揮念此五年別蒼茫千里違相看各衰老安問瘡

與肥童穉汝未識漸能勝帶圍今夕復何夕鐙燭何光輝  
舉觴胡不醉念汝今暫歸嚴寒遠行役隴阪高崔魏驪駒  
已在門不遑叩荆扉吾欲送汝去力不能奮飛再拜謝阿  
兄欲別重依依王事亦有程行當旋京畿松楸許展謁  
君恩或庶幾所悲衣錦榮養不逮庭闈尙願對牀語爲兄  
大耋祈努力愛景光春草還芳菲

祁大夫祠敬謁感賦

祁縣書院

惟祁古著姓系出軒轅紀陶唐祖伊耆派行有由始自晉  
大夫後世以祁爲氏七邑旣瓜分三家遂鼎峙吾宗雖散  
處支別有條理高隱與忠烈燦然存信史

自晉孔賓訖明  
忠愍公代有名

人南北郡望殊多自河汾徙茲縣以氏名聞風尙興起馨

香食舊德百世修典祀崇祠啟講堂輪奐一何美地與宮

牆鄰絃誦切仰止比年授生徒仲氏實居此

三兄主講昭餘書院數年

今夏以目疾辭

僉曰黃羊齋允宜式多士繫余家馬首采邑今墟

里邇來輯字說古訓究原委

祁大夫字黃羊見呂覽近年余輯諸家字說聚藏祠中

周官重六書名字相表裏時儒或目笑大夫應色喜舉善  
有家風諷咨媿奉使入門拜遺像乘驛緬前軌當時請老  
歸憂國心未已進旣無所援退更安所倚千載精神存放  
悲接筵几先民信可作敬哉桑與梓

### 望縣山

從來謀國總忘家羈勒何功忍自誇深谷已甘儕雀鼠宮  
門誰爲賦龍蛇黃金鑄像終無益白水盟心更可嗟縣上



祠堂今在否斷林寒日有歸鴉

郭有道阡

弋羅何處視焦明縹緲仙舟自在行  
叔度不妨傾後輩中郎翻覺媿先生  
荒原古木圍祠宇落日寒山擁縣城  
千古公佗似同調題碑豈爲博書名

傳青主補書蔡碑

冷泉關

靈石

平明出山郭犖确傍河濱行見管涔水言尋冠爵津

水經注一

作寇爵卽雀鼠谷

冷泉無覓處破寺偶逢人同首繁華地風光迴

出塵

兩渡鎮晤何刺史

榮經

渡口望橫汾虹橋跨水分客心如倚棹樵路已侵雲往者

雙谿老今之萬石君餘風見淳樸相送愧殷勤

韓侯嶺謁淮陰祠墓

不能辟穀學神仙更宥希蹤魯仲連國士尙聞酬智伯主  
恩終勝置縣田解衣推食誠無恨烏盡弓藏亦可憐今日  
王孫祠下過一抔猶對漢山川

望霍山

經旬厭登陟山國何繇邈奇觀忽闖露東南見太岳雲煙  
莽蒼中去天不盈握大山宮小山斯論千古確回思太行  
陘氣象莫與角何況衆培塿渺焉詎可學五嶽視三公作  
鎮仰高卓有如端嚴士正笏侍帷幄聲色屹不動至寶已  
在璞溫公與潞公吾鄉僂先覺秉氣得雄厚謀國必誠慤

乃知包容力萬物歸彫琢西征想太華仙掌雲中擢便思  
把芙蓉行將問鸞鷲

自霍州山行抵趙城

水急煙橫斷山高日上遲鄉關暗超越客路覺孤危往歲  
萑苻警連城羽檄馳時平想忠節指點故侯祠

趙城之變  
邑侯楊菊

泉延亮死之今  
建傳祠奉祀

洪洞

楊侯吾故國馬首昔東遷一去大槐樹經今五百年

余家  
明洪

武初自洪洞大  
槐樹遷壽陽蒼茫問家室感慨付雲煙惟見雙渠水清

流抱郭田

澗水出岳陽  
南入汾水

玉峰書院寄懷六弟

玉峯恰對講堂開會爲諸生問字來坐席未安鄰警至登

陣不待縣符催

乙未歲弟幼章主講洪洞道值趙城之變賊來攻城守禦部置縣令俞君悉委之弟

擊散賊衆

城得保全弦歌久已銷鋒鏑保障今方捍患災

黃州武昌兩郡連年

辦莽莽炎荒多盜賊

朝廷遷擢正需才

平陽郡城喜逢周竹谿

維新

太守歸里

江海十年別相逢一解顏吾方叱馭去君已倦飛還興頌

傳南國移文笑北山城頭藐姑射或許共躋攀

汾上聞雁二首

客行日以遠歲莫不知歸征雁鳴何急將南更北飛

關隴渺無極役車殊未休悠悠汾水去不肖向東流

陽城李松溪

毅

國士橋詩豈有英雄輕去就可憐恩

怨太分明二語翻案生新於當日情事似有未盡作

此解之松溪名句固不可沒也

孟談亦是知幾士智果還爲盡族行沈竈產蛙原太逼漆  
頭爲器更無情不聞杵臼甘先死猶有青萍恥獨生莫作  
尋常恩怨看當年心事本分明

候馬驛館晤絳州段怡園

仲庚改名炳圻

羨君瀟灑得天真仕宦歸來迥出塵同學少年惟我少而  
今已是白頭人

聞鷺湖上柳條秋宣武城南踏月游今夕相看鐙燭下舉  
觴重話杜陵愁

仙碑碧落渺煙雲絳守園居亦妙文說與君家雙驥子好  
從柯古證新聞

老來拈筆轉新奇脫手連篇絕妙詞從此綠楊城郭裏家

家爭唱段黃鸝

君近戲爲黃鸝詩百二十首

寄懷裴鍊軒驄太守卽贈其弟驍

三眷家聲遠離居歲月長彩雲今出守

鍊軒今官雲南楚雄太守其子虹玉

丙午副榜綠野昔登堂陰德門將大遺書學必昌老成吾及見

感舊獨蒼茫

尊人與先大夫同官農部至相善

聞喜安邑途次再晤郝夢山臺魁聞其有子而慧喜

賦貽之

相逢先問衣師驕話別方慙鬢雪飄老去明珠真愛惜年

來舊雨轉蕭條詩人合住王官谷過客仍題國士橋細酌  
流霞重翦燭猶疑清夢隔雲霄

小憩猗氏道旁古寺遇陳孝廉

鴻林邑之郭村人已  
亥舉人設館寺中寺

在村西

北里許

下馬得書聲虛窗曉日明悠悠逢逆旅款款見鄉情山色  
中條近村煙四望平煎茶問風俗喜說長官清

猗氏令傅  
凌煙獻著

曾任神池晉  
之廉吏也

渡黃河十一月七日

曉發風陵渡橫舟鼓角催大河千里曲高掌五雲開日擁  
秦關出冰浮塞雪來故鄉回首處客路信悠哉

宿岳寺萬壽閣望華山夜發渡敷水曉憩蓮花寺抵

華州

渡河西去風煙掣斜日三峯出高潔寺樓氣與山相埒引  
手蓮華翠可擷清夢未了鳴檐鏤秉炬出門水流咽曉來  
左顧忽驚絕太華雲連少華雪寒林織煙亂行列山椒屋  
脊遠明滅道旁石筍如斷碣老樹似字能波折古刹經火  
泥壁裂舊題記與老衲別三十九年飛電瞥嘉慶辛未癸酉  
秋冬間會  
兩過此僧言對山有龍泉天池上與銀河連鳥道橫絕峨眉  
顛欲往從之心茫然

赤水鎮

平原鬱鬱有人家野店蕭蕭駐客車新米上街喧凍雀舊  
詩題壁剩塗鴉雲開已覺藍田近樹斷遙看渭水斜便借



畫圖銷旅思秦中風景似京華

新豐

從來野語笑齊東漢史傳聞事竟同一自風雲過故沛頓  
教鷄犬識新豐杯羹家事艱危後縣蕞朝儀草莽中可是  
錦衣歸太急沐猴千古恨重瞳

灰塹相傳始皇焚書處

礪谷知何處

礪谷阮  
儒處

灰塹尚有灰六經終不滅一炬竟先

災慘澹陰符出蒼茫赤帝來至今原上草秋燒滿荒臺

周道昔云墜羣言多異同不經秦火劫誰識漢儒功口授  
篇章外心傳訓詁中嶧碑焚已久刻畫信徒工

幽館

幽館經行處風詩想像間  
巖原真入畫桑棗自成灣  
陶穴

民風古張弓士氣嫻

時州牧  
校武試

停車看積雪曉日滿空山

邠州西二十里登大石佛閣

策杖循危磴摩崖讀舊碑  
化人遺寶相汎國近邊陲  
欲鑿南山石仍鑄七月詩  
酌匏何處薦佩玉想威儀

夕次長武

邊城傳說漢陰盤地迴天  
高朔氣寒落日鶉觚原上  
望浮

雲東下是長安

地極高四  
望不見山

涇城三章

涇城之西惟古同中曰西  
王母瑤池之宮宮於山顛  
梁於水滸我行悠悠將適  
何所涇城之西山徑孔延  
似有人

居不見炊烟有車有駝自西徂東我行悠悠將適空同  
高原際天四不見山涇城之西乃降於川川原紛糾陟彼  
隴首我行悠悠歲聿云周

轎窗玻璃曉寒噓結戲以指畫蘭一叢連日變態生  
新畫筆不能到也爲冰蘭詩以紀之

幽芳在空谷無人甘自屏何來風塵中見此冰雪影瓊帷  
一片烟噓結曉光靜彈指偶一試花葉儼修整詰朝忽驚  
詫舊態生新靚綽約窈窕間離合神光併天巧非人爲畫  
工殊不省自憐託質微素心抱耿耿得侍君子輿拂拭已  
云幸但恐朝陽晞不畏繁霜冷何繇紉作佩聞香與之永

過彈箏峽

西去瓦亭驛二十里在固原州東

寺樓層疊路迴環一綫奔流四面山日暮郵亭何處宿斷

雲殘雪過蕭關

石壁刻蕭關鎖鑰四字

十一月十八日曉發瓦亭渡六盤山

荒亭風急夢難成破曉衝寒跋馬行雪後山如少年老天

邊月是故鄉明低徊往事頻看鏡慷慨當時欲請纓

嘉慶癸酉

那文毅自蘭州督兵過此

余從先君子客公幕同行今日白頭重過此僧寮已改況

題名

僧號大澈

會甯晤吳復齋大令

性成改名信臣

度隴日登降爰涉祖厲水冰雪走玉龍蜿蜒五十里兩山  
屹對立土石雜赤紫其水不可飲斥鹵間泥滓厓深井難  
鑿泉苦味差似居民以窖蓄惟雨雪是恃力不辦一窖其

家必流徙會州固山國民勞乃至此君如吳隱之到官旬日耳一畝亦分明其它可知矣時俗薄廉吏但謂清在已不知益何事相與趣貪鄙隴西古名郡吏治今稍靡斷斷清濁間紛攘殊未已清且畏人知濁流眾所恥請看漢守令必自興廉始

得六弟書

近有關中使遙傳漢上書開緘聊見汝遠道轉愁予京洛

塵猶在

弟於月之八日自鄭州發書

鄉園夢久疏五年艱一面相望各

躊躇

聞說槃瓠種跳梁楚粵交

書云湖南新甯縣匪徒十月十三日據城戍官

燎原須

早撲伏莽恐旁鈔比歲鴻飛野何時鳳在郊終當謀保障

毋但責包茅

惆悵

盡篋緘藏歲月深故香殘色總沈沈裁縫已是當年事檢  
點難爲此日心無復短鐙思遠道更堪邊月送寒碓幾回  
欲著還惆悵不待霑裳已不禁

王公橋

安定縣地乾隆間蘭州太守王廷瓚修故名今久廢矣道光二十一年縣令史翹別修土

道至今便之晴嵐山在其西陡曲險與六盤山同 山神祠鐘款青龍尾山官道

天外青龍掉尾來地中車馬出奔雷百年鞭石幾時斷萬  
里梯山今更開行道居然歌兌矣苦寒得不念艱哉茲遊  
差幸無風雪且對晴嵐一舉杯

晴嵐山寄懷伊犁薩湘林將軍

不賦西征四十年，絡盤獠道說茫然。鷄鳴下見煙中屋，龜  
坼平鋪雪後田。持節敢云同汲黯，乘槎何處覓張騫。詩成  
欲託冥鴻去，碎葉城高直到天。

君題六盤山有十年  
六度六盤山之句

小憩巉口堡

安定縣西四十里

山如階級路如弓，行盡坡陀迤邐中。遙見村居知水近，偶  
詢麥價覺年豐。羣鷄上屋人看客，午日當窗雪照空。巉口  
農家最淳樸，讀書應有好兒童。

履齋亭集卷三十一

壽陽祁窳藻叔穎

古今體詩四十四首

己酉庚戌

十一月二十八日抵皋蘭行館奉簡馮曉滄比部董  
醞卿鍾石帆兩農部

隴雲萬疊隔春明坐對寒鐙話客程河自蘭山下蒲阪雪  
從玉井接金城鄉心未免唐風戀驛使猶傳蜀道行

奉旨使

蜀面諭改赴甘肅省城

它日東歸尋舊迹看君佳句各編成

質莊親王集諸家聯景山水兩卷爲李季雲觀察

恩

慶題

國朝盛文藻



列聖實天授銀潢近奎壁光耀彌宇宙仰惟

純廟中文思咨教胄東序羅圖書三天蔚耆舊惟王秉異  
姿學業日以懋造次必儒者春容盡撞扣餘力游藝事揮  
翰揚綺繡六法更深造氣奪山水秀是時朝野間輦轂才  
輻輳東平爲善樂河間聚書富縹緲米家山聯絲入懷袖  
精心萃眾腕捫格得奇構云是明賢製巧絕誰與門王曰  
姑試之凝思向清晝浮嵐皴一角遠意含萬皴上元鎚火  
競虛室鑪煙逗回看坐上客玉堂正對雷傳觀遞嗟歎點  
染爭往復十手儼一筆六轡工馳驟人生如飛鴻泥爪難  
尋究自從三老歸悵望月幾殷崢嶸歲事改跌宕賓筵又  
此時寫懷抱況復感物候蹊徑遂各闢藩籬不復囿飛騰

風生腋變化雲出岫乃知雙劍合不必一冶就怪君何處  
得使我無心覲得毋念羈旅短檠伴寒漏石渠昔拜

賜筆法初窺竇

曩歲

南齋校勘書畫會蒙

賜

眼明復

見此連珠燦列宿未甘老顛下似出大癡右苔岑泯同異

蘭亭孰肥瘦近得數卷詩鏗鏘協金奏想見申白公曳裾

侍清酌

去年從殿肆購得王與師友唱和詩賦數卷殆同時流傳也

當時慨聚散繾綣

情何厚卽今幾流轉我輩重邂逅君家三萬軸一一芸香

透此畫尤愛惜密字互緘覆崎嶇隴阪間懷璧將奚售側

聞葉氏卷粉本千金購曾入詒晉齋銀鈎輒題後所好儻

真龍鴻寶宜並壽

第一卷乾隆辛卯冬質莊親王因見明賢十人聯景米

山圖

振之劉原起道樞陳祿君辰張宏這侯浦融文甫朱士瑛袁孔彰盛茂王峻俱為君平屬作紀年已

已閱二十六年續作者為邱嶽又五峯隱人盛年以黃大癡法仿其製為長卷

一角俟深於畫者續之以集煙雲之勝幀端有壬辰上

元 皇六子自識續作者毘陵錢司寇 維城 其弟季木

維喬

張國學玉川 洽 方供奉 琮 婁水王中翰 宸 華亭董

上舍 椿 富陽董侍讀 詒 濟南朱明府 文震 婁水毛中翰

上京

凡九人仁和李侍讀寶幢 汪度 題曰無聲聯唱蓋

用兩山居士毛氏論畫語朱明府題簽歛溪汪持齋 廷

璵

跋押縫 皇六子名印

第二卷亦李侍讀題曰異苔同岑朱明府題簽作者毛

上京

方琮 文震 王宸 董椿 詒 凡六人末段乃 皇

六子作並八分跋時癸巳閏三月上澣錢司寇伯仲張國學已歸里矣前卷十人此卷七人位置與前卷稍別畫尾印曰御賜題畫句云學餘游藝亦工夫前卷皆從大癡落脈此卷各家逐段叅變王自製一紙亦作兩種筆意

明賢畫卷今藏漢陽葉氏東卿

志說

家或卽王託興之

本有成哲親王跋季雲曾見之云張君度卷屢見別本餘各家亦少名貴氣疑非真蹟

並記

道光二十九年十一月余奉使蘭州時甘涼道李季雲兼權按察使共事而月偶談及都門所藏書畫荅云行篋只兩卷耳因出示並屬敘顛末余旣爲題詩第一卷

復綴數行於第一卷尾亦李君巨錄跋文俟後人攷索之意也又記

遊制府後園遂登城北望河樓感舊述懷

臘日無風天氣暄主人留我游灌園

甘肅督署後園名

入門一曲

開東軒迴廊夾道交籬藩木葉既落枝柯繁避人鳥雀爭騰騫小亭低檻手可援連岡起伏如驚駘老圃界畫泉潺湲倚闌聊息蹇腳煩回眺似有雙朱轡乘之可陟城北垣拂雲樓卽望河樓前楹高雲亂翻黃河直接崑崙源冰橋踐雪車馬喧以二十四船爲橋冬則徑行冰上謂之冰橋下有千丈波濤掀西來天馬通大宛隴樹東指咸陽原主人危坐客有言此邦鎖鑰天西門葱嶺兩道兵四屯萬里一綫達

帝閣控馭中外節鉞尊野番回鶻羶裘溫饑鷹側目豺虎

蹲邊將日醉蒲桃樽守非其人寇卽婚漢唐得失不敢論

羈縻之義古所敦翦其支蔓固本根南望龍尾

山名卽皋蘭西支乾

隆問阿文成公破撒拉爾逆回於此餘烟墩文成祠廟歸然存天陰似聞鐵

騎奔憶昔作客來西垠開元相國仍有孫

文成之孫文毅嘉慶十六年官

陝甘總督十八年去任爲我掃徑加盤飧此園樸素真山村兩載日

涉窮晨昏碑字鈎勒手留痕

文毅家藏米老懷素墨蹟鈎勒上石余曾與其事池

水自清河水渾往事欲說聲先吞年少氣猛過孟賁豈料

齒豁頭髮髡人事變化鵬與鯤舊游重歷皆

君思論交四海如弟昆吾舌豈爲主人捫歸來凍月側金

盆他日更約看朝暾

憶昔行

憶昔少年年十九從先君子客隴首春官試罷秋稼刈壯  
志不屑田園守維時臺帥雅愛士一見輒許信非偶高門  
公子有家法抑志虛懷敬賓友讀書每聞風雨集拔劍或  
作蛟龍吼五泉脩禊補圖畫九日登臨縱詩酒青鐙兩載  
共論心絳帳一朝慙揮手回思馳馬六盤道峻阪直下千  
丈陡高情且擢玉井蓮離緒不牽灞橋柳是時衛滑方用  
兵投筆徑思衣短後令公勲勞在鑿鼎賤子文章亦組綬  
四十年來人事異白雲變幻如蒼狗而我垂老更西邁知  
已未酬恐終負比年莽莽海氛惡蜃市雲煙逼刁斗大河  
長隄屢衝決南國哀鴻數奔走司農仰屋日嗟歎金粟雨

生術何有太倉秬稻轉溟渤內府泉刀出隴畝輸將幸藉  
士氣奮流離忍見民生培彌縫委曲國體大盤錯艱危

主恩厚登高望遠尙飛動力薄才疏柰衰朽金城形勢控  
西陲天下精兵此淵藪軍儲每歲三百萬要令邊塞實糧  
糗自從文毅罷節制豈乏武臣任桓赴蕭規終必賴曹隨  
召父後難爲杜母護羌校尉去不還充國屯田今在否

祀漢冠軍侯霍去病營平侯趙充國護羌校尉鄧訓曰三將軍

朝廷宵旰正疇咨將相權衡屬耆耄古來萬里倚長城  
秦時臨洮北境也長城起自縣西沿河而東接連靖遠縣界在皋蘭境者計二百餘里大抵先聲奪  
羣醜年豐民樂吏治肅何用倭遲歌四牡歸去田園儻未  
蕪白頭甘作支離叟



行館曉坐

落枕寒聲想佩環五泉泉水繞城灣曉來何事鈎簾坐貪

看東南一角山

皋蘭山在城南五里有五泉曰甘露曰掬月曰摩子曰蒙曰惠又有瀑布東西岩

河橋

萬里崑崙水西來此一橋造舟仍古制題柱尙前朝枕席

師能過羌戎氣不驕憑闌正清晏猶憶霍嫖姚

城西北鎮遠門外浮

橋明洪武初以巨舟二十四維之鐵柱河凍則拆冰泮復建趙充國圖上方畧治橋道以制西域從枕席上過師則橋之由來遠矣

載皋蘭縣志

北嶺千重雪長河一夜冰彩虹藏不見銀漢聚而升凍豈

滹沱合寒應積石疑蟄雷何處伏吾意轉兢兢

鄉思

鄉思春前發年華客裏驚橋水連遠塞嶺雪逼高城晴雜

風煙色寒稀鳥雀聲遙憐衡浦雁寂寞尙南征

時六弟之官粵東

古漁同年

明誼

以所藏董香光書王介甫金陵懷古

詞卷屬題

嘗怪孟東野低頭得退之誰云半山筆不及大江詞烏巷  
斜陽地鴻堂夜雨時精靈雙劍合孰敢辨雄雌

蘭山書院

邊疆用武地實賴文治撫類宮禮樂宗書院爲之輔城東

宅爽塏五社生徒聚人材蔚風雲師教嚴鐘鼓胡

旣錢唐人盛

元珍常

及牛

運震滋

孫

景烈武

楷模在堂庶厥後吳先生

臨松屋

多士亦鼓舞至今餘課業

蘭山課業松屋先生想編集又有松屋詩集

見用心苦憶從先君子講學洫茲土維時文毅公禮賢躬  
握吐公曰吾得師如工示規矩士曰師之教如木就斤斧  
文藝乃餘力蓄畬惟訓詁經義與治事二者實兼取賤子  
廁其間趨庭偃僂俯時時奉講席漸漸涉書圃遂紬石室  
藏且侍藜杖拄短鐙每近案長日不闕戶兩載獲三益芝  
蘭幸與伍俞君德淵陶泉官至兩淮都轉邦之彥結交深肺腑終爲濟  
時才遺愛滿江潁馬君疏由庶吉士改官知縣亦騰上時論歸尺五  
出爲神明宰有子今接武落落諸同學文行悉可數爲儒  
名著書作吏傳治譜嗟余好奇服垂老媿簪組崎嶇適隴  
阪邂逅見環堵廣文吾故人隆德訓導楊君元勳但訝衣冠古不知  
額書上姓名存某甫西河模楷額書諸生爲先君立浩浩大河水  
中流有

砥柱可憐潢與港，涓滴竟奚補。幅巾重登堂，歲月如發弩。  
青雲看後塵，白首思舊雨。作詩遺同舍，所望紹鄒魯。

瀕行得京寓書

十二月十八日

郵程閱五九，判牘費兼旬。餞歲仍爲客，歸期正及春。二十  
立不嫌驪唱促，且喜雁書頻。遙憶屠蘇酒，尊前望遠人。三

二十一日拜摺啟行回京復

命恭紀

初回隴外使車塵，已是朝班待漏人。萬里往來三益友，曉  
醜聊一年迎送兩新春。銷磨歲月慙高位，控馭邊陲望重。滄  
石帆。臣歸去農書猶及進。

御園柳色正青勻

次荅曉滄醞卿石帆六盤山和張詩船中丞詩二首  
莽莽隴山出涓涓涇水流行人方爾足積雪更攢眸高逐  
雲邊鴈潛窺壑底蚪青絲馳峻阪曾憶少年不

登臨得佳句來往屬名流每倚高僧壁頻回倦客眸清譚  
聊捉塵險語忽驚蚪爲問淮陰嶺題詩似此不

有感

郭解交游到鉅公漢廷循吏憶文翁杯觴談笑何多暇撫  
字催科已兩窮坐使空倉肥雀鼠眼看高閣鬥雞蟲金城  
自古安危繫莫道邊陲歲屢豐

金縣安定道中

簿書了卻此身閒誰謂馳驅行路艱積雪漫空車道嶺飛

流送客馬銜山

馬銜山亦作馬寒山在金縣南

歲華不覺天邊度

是日春立春

色先從隴外還茆店幾家聞爆竹竈觚觴酒正開顏

車道嶺

安定縣西

盤空萬疊走蜿蜒縹緲繩輿往復旋仰視浮雲入飛鳥下  
臨絕壁起炊煙山田一飽猶難得匡樹孤生亦可憐雪窖  
居民吾媿汝且斟苦茗抵甘泉

安定城館喜遇馬南園山長

疏

君已抽簪二十年那堪重話卅年前金城舊雨今無幾絳  
帳高風老更傳作吏誰知山澤樂還家且喜子孫賢別來  
爲憶相逢處春在邊城夕照邊

破梳

鬢髮年來半雪霜，蕭疏惟爾共行藏。  
挑鎗每助吟詩興，攬鏡還憐作客忙。  
一自折釵沈古井，便如團扇棄空箱。  
多情祇有香山老，黯澹緋衫未忍忘。

再過王公橋壘前韻

聞說秋霖挾浪來，兩厓合沓走風雷。  
龍蛇起陸誠難料，豺虎當關定莫開。  
東道藩籬猶藉此，北山斤斧亦何哉。  
祠旁野叟曾相識，新雪烹茶已滿杯。

出夏家寨口小憩雞嘴人家

會甯縣地

谷暗衣裳冷厓開，耳目新遠疑山讓。  
地晴覺日憐人野，堠聞官過村氓看。  
客親天涯有時節，白屋氣先春。

隴上寄六弟粵東

昨遇慶原老太守爲言吾弟手書楹勤求公事非多事屏

卻私情是近情

月前六盤山遇慶陽太守步香南際桐述弟聯語

斯語堪爲同志

勸幾人能得此心平更須斟酌公私際莫使鳴蛙兩部爭

### 會甯山中

一條雪練掣寒光兩壁丹砂削劍鉉直恐土囊霾白日翻  
疑銀漢溢紅牆喧呼但訝人聲急側立還愁馬足僵猶有  
茅茨時隱見欲尋樵路轉微茫

### 自靜甯州東行九十里至隆德縣城

隴干城東路寒林翳村堡春風幾日吹枝榦已自好兩崖  
夾人立巨石向我倒隴水繞其足如帶細縈抱山開川路  
平沙淨日光皓楊柳生遠烟冰雪點晴昊憶昨所經過童



山乏寸草水泉味苦澀日日脣吻燥何期得清曠爲我滌  
煩惱況逢佳主人驛館先灑掃雙牛駕碌碡農事亦何早  
此水入秦州同谷憐杜老茅茨千載後遺蹟足搜討遠游  
易悲慨放懷慰枯槁層陰暮又合明日絡盤道

除夕宿瓦亭驛

六十年中經歷事四千里外宦游人重來隴阪歲云莫默  
數嚴更夜嚮晨東望瑤池寒有雪西瞻玉塞靜無塵客懷  
底用增惆悵已覺椒盤氣象新

瓦亭驛館述懷呈曉滄醞卿石帆三司長

今夕定何夕燈火爛如晝客從隴外歸息此路旁堠同行  
三四人萬里倏往復雨雪導我先楊柳送我後山僧亦有

情筆札得邂逅乾坤何浩蕩歲月暗奔驟壯年侍板輿嚴  
冬發楚岫大河渺難涉曾冰橫急溜徘徊榮澤縣歲莫無  
親舊蔡侯意有餘寘酒羅籩豆使我顏色歡逆旅奉慈壽  
乙酉冬湖南學政差旋榮澤守歲爲客令人老追思時內疚瓦亭一小驛  
風俗見節候居然冠蓋集且喜朋簪湊論詩共翦燭問夜  
如待漏諸君濟時才吾衰幸及覲鄰鷄非惡聲櫪馬已嘶  
殿永懷明發篇兀坐夢難就

瓦亭東二十里過彈箏峽

固原州地

隴山高不奇奇觀乃在峽山與水爭地天宇爲之狹水與  
人爭道清激不可狎一條冰雪光太阿忽穿匣中有玉龍  
吟萬古聲歎欲上有縹緲樓闌楯凌空插想見飛仙侶玉

柱鏗銀甲斑駁厓壁字紅綠嵌岌業沈侯句絕妙似得謫  
仙法是日正元日幽徑行旅乏停輿恣攀躋薛橙衣共扱  
寒流觸危石眾響猶隍呷祇恐伏秋漲山力不能夾蕭關  
古天險鎖鑰孰敢劫豺虎化鸞鳳時平游興洽羽人如野  
禽見客氣爲憺孤松獨有態翠偃風搖筴蕭條雪欲來馬  
頭雲亂壓吾意轉遲回非爲度隴怯

彈箏峽唐德宗時官軍守此渾瑊亦據守

此口見明趙時春撰平涼府志

至和丙申閏月晦日彈箏峽詩沈唐公述泉聲與巖綠  
清咽瀉餘悲水到不流日絃應是絕時調長終古在人  
聽至今疑莫恃潺湲險胡爲自覆師馬用賢子擒劉洵  
孚伯彭再嵩宗旦此詩刻南厓西峽口壁上

并記

正月三日曉行微雨

春來剛十日好雨恰依時似雪不成絮如烟仍散絲塵消  
衣暗著土潤草先知漸喜秦川近風光上柳枝

回中山謁西王母祠

涇州城西二里

秋風黃竹總堪哀誰見瑤池彩鳳來宴飲不聞王在鎬鏡

歌空憶上之回只今雲氣收殘雨終古河流挾怒雷

涇水西來

納水南會於山

白鹿已歸天馬得神仙儻許屬雄才

相傳周穆

漢武會王母於瑤池卽此地  
詳涇州志所載陶穀祠記

涇東原上大雪

正月四日

高原四無山竄望不可極官道直東西農田亘南北寥寥  
數村舍慘澹寒林色竟日百里間雪霰無休息野曠絕鳥

聲道長限馬力客行畏遲莫非爲簡書逼京國書不來我心日以惻仰觀天四垂陰雲正如墨

夜宿長武縣西廳留贈張梅生

正脩

大令

萬里客歸初遇雪平原風靜且停車經過隴阪崎嶇路看到瑤池爛漫花古轍紛紛尋馬跡寒林簇簇見人家山城最是豐年樂吠犬生鼈夜不譁

曉發長武

官鼓統如鎧燭輝遲明爲客開郊扉雪消野塊亂鴉點厓斷境垣驚雉飛幽土晚寒民事亟涇原春曉行人稀坡陀幾折向前路林表一痕明翠微

哀流民

連年荆楚災流民去復來江漢城高蛟龍怒瀟湘澤遠鴻雁哀聞說內帑三十萬

皇恩特沛由

宸斷可憐三戶蓋藏盡升斗未及先流散蜀山嶽釜隴水咽骨肉羈孤生死半邠郊石佛寺老衲向我言近者九江民劫奪僧寺錢使爾飢驅且爲盜爾舉可誅我心悼司農八載亦數奇水旱兵戎靡不到今將去隴東適秦眼中又復哀流民民爲馬官爲牧不求芻秣反擇肉比年崆峒小麥熟郡縣無端糶倉穀

穀價生息甘肅州縣虧空積弊已具疏議禁矣

牽夫謠

朝牽西夕牽東西登隴阪雪峩峩東涉涇冰冲冲東來

西去無朝夕我生胡爲傍官驛官家牽夫用壯丁老弱婦  
女猶可耕自從西陲罷征戰邊城玉貴倉穀賤公事日少  
私事多踵決肩摩走郵傳側聞官吏相疑猜東南又見使  
車來牽夫雖苦願迎送萬一飛蝗化爲鳳

贈涇陽徐董園

正誼故太常少卿熙芬先生之子

京國論心感舊遊空餘翰札對牢愁飛騰後輩看涇水清  
峻家風得李舟天外蓮花知久待去冬相候於華寺  
今再晤於醴泉山中  
桂樹可長留會看騏驥材方駢卻媿馳驅老未休

咸陽原上

高冢連天野燒空當年鬱鬱復葱葱如何萬古精靈氣祇  
在寒鴉夕照中

灞橋感懷楊密峯中丞

名巖

楊公去後亭猶在灞上行人感慨過莫怪文沙成貝錦古  
來離恨此橋多

橋在長安城西二十里

陌上東風楊柳斜可能作絮只飛花請看河畔栽桑地機  
杼長安十萬家

橋工堅固費十餘萬金餘貫並成漕橋河  
畔植桑彌望選城固機匠教織郡人至今  
猶備  
述之

華清池

滔天禍水出龍漦流恨煎愁到此池烽火幾朝經劫後温  
泉何日是寒時鸚哥莫問開元事牛女空吟七夕詩惟有  
驪宮千歲柏森森猶似拂旌旗

觀驪山石刻



星辰湯上箴銘在大筆燕公託諷深猶有金源兩片石能

將綺思寫愁心

唐張說溫泉箴 金僕散汝弼  
風流子詞 金移刺霖七絕

正月十三日大風渡黃河

客豈不欲行柰此風浪惡大河橫我前狂飆裂虛閣晨起  
雲亂飛亭午日光薄鑪灰死不然魯酒孰與酌主人色躄  
踏客意轉蕭索揮手決獨往長揖出山郭東風逆浪來沸  
湯如鼓囊一葉委中流黃沙天四幕人聲與艣聲併力互  
前卻雖云方舟驚祇恐布帆弱稍近北岸山繫纜得垠堦  
回瞻浮槎路雲漢莽寥廓誰爲東道主吾欲神靈託送者  
自厓返沈沈閉關鑰檣烏獨有情飛鳴繞林壑

元夕雨

北相驛屬安邑縣

秦嶺猶栖雪，長河已泮冰。春隨一夜雨，寒入上元燈。旅館愁應減，豐年夢可憑。曉看村樹外，新綠起煙朦。

夏縣寄懷毛冠三

應觀

南國老儒吏，十年歸故山。

君博通經史，著有經圖彙考律呂正音諸書。余視學江左，君爲

夏縣令

史家今涑水，經術古河間。尚有孫傳硯，應無客敬關。

何由問花竹，把卷對開顏。

皋陶廟

洪洞縣南十里

社祭仍千古，民懷尙萬家。空庭懾魑魅，老柏鬱龍蛇。但覺心寬粟，何嫌面削瓜。蠻夷兼寇賊，天使贊重華。

饒訖亭集卷三十二

壽陽祁駕藻叔穎

古今體詩四十三首

道光庚戌  
咸豐辛亥

至甲寅

和三兄閒齋詩四首

閒翁真是素心人  
獨坐閒齋得句新  
惟有白頭老兄弟  
退朝相對卽閒民

同甲誰爲丙午人

聞見錄文潞公爲  
同甲會皆丙午人

春來但覺歲華新  
捫

筲尙有雄豪在  
莫道先生是散民

席間子弟兩三人  
問字攤書發興新  
應笑當官忙底事  
十年負版媿司民

還鄉偶似錦衣人  
故里雲山入夢新  
何日扶藜攜社酒  
耦

耕長作葛天民

三兄賀得孫次和

三索三男得先庚卜後庚

兄於今年春得第三孫名曰庚吉此孫伏日生因名福初適協

庚庚相續之義年來家慶積老去宦心平桑果須勤植荆花好並榮抱孫同一笑慰我弟兄情

新城陳子鶴大司寇蒙

恩歸養屬書堂額卽題奉餞十二韵

一代絲綸手中朝磊落人

君恩兼母壽孝子卽良臣

司寇嘗蒙 賜 清正良臣額書

拜舞承

溫旨褒榮軼等倫夔龍規契合烏烏許情陳陰德門方大  
儒風席自珍南陔娛歲月北極動星辰惜別周廬影難分

繞膝身樓臺何地起甘旨此堂親曉露森庭竹秋江味野  
蔬晨昏皆

帝賜菽水亦

皇仁卻顧彭宣老多慙公瑾醇賦詩同燕賀紗幔祝長春

尊公雪香先生  
寓藻入學師也

夢中得句醒足成之呈三兄

天寬地窄小茅廬長夏槐陰好讀書寄語閒齋應一笑打  
頭恰是欠伸餘

中秋前三日還園居

落日隔西崦餘光明遠埃薔花高笠過荷葉小車來淀市  
秋仍熱園扉晚尙開紛紛蘿薜月人影共徘徊

三兄將歸里留詩爲別次和二首

驪駒將北發鴻雁欲南回

六弟初擢湖南布政使仍辦理廣東軍務何日成三

老還鄉共一杯但教松菊在莫歎雪霜推秋色瞻衡宇聊

吟歸去來

萬里金城路團團月幾回驛亭容駐馬山館記銜杯

去冬奉使

蘭州往來經過

吾邑與兄相見作客心猶壯論詩氣不摧

兄於四月來都至九月得詩七

十餘

閒齋留一榻它日喜重來

再和三兄六月四日見贈之作

吾兄來京國閱日十旬五但遂孔懷樂不憚遠行苦初來  
淀園居尙厭蛙兩部杖藜偶入城復喜朋簪聚虛室延晨  
曦涼棚捲夜雨笑余數往還衣服半塵土閉目日危坐似

欲忘聽親袖出一編詩杜韓爭步武上言崇令德昔賢可比數下言勤職守仰荅

明聖主憶與吾弟別再聽山城鼓過門不暇入力爲王事  
努永念

朝廷恩榮及伯仲甫無爲衰朽念期作中流柱願兄老益壯媿我施未溥歸思及重九秋陽變春煦相期保晚節黃  
華馨老圃

賜觀晉臣王羲之快雪時晴帖墨蹟敬題

天門鳳闕雲霞爛塵世何繇覩神翰傳聞二十八驪珠  
寶笈收藏此爲冠三希

精鑑屢

山谷正集卷三十一  
三  
標題萬本臨撫發璀璨每從蠶蠟見精神何況瓊瑤親几  
案雲端林表動佳想繭紙晴窗雪花粲銀鉤鐵畫數行字  
風骨端莊趣怡渙仰瞻

天藻麗奎壁浩若滄溟納江漢雲林兩幀更傳神

撫景拈吟寫清宴唐宗好古力搜求祇爲書家留傳讚豈  
知

淵衷周品物游藝原非事珍玩我

皇握符契

先揆萬卷圖書

一誠貫

幾餘考鏡到石渠簡冊紬尋出東觀山陰妙墨卽蘭亭



詔許傳觀共驚歎心正筆正真諦存肥瘦何須苦分判湖

源王氏逮顏柳一脈相承靜可按憶窺

祕府蘇米蹟

宋蘇軾武昌西山詩米黻天衣禪師碑墨蹟皆行書

逸氣縱橫恣汗漫

細參此帖獨圓勁鍾張未遠存質榦中秋伯遠亦希珍晉

代風流思運腕

三希堂以此帖及王獻之中秋帖王珣伯遠帖得名

世間雞鶩徒

紛紜

天上星雲自糾縷

小臣

眼福一何幸

聖學心傳末由贊雨暘應律休徵符干羽舞階

文德煥萬方安善慰

宸懷珥筆據誠荅

宵旰

謹案 石渠寶笈首載此帖素牋本行書二十四字後  
有山陰張侯四字又君倩二字幅前有廷字印明吳廷  
餘清齋  
元趙孟頫劉賡護都沓兒均奉敕跋明王穉登跋明汪  
道會文震亨吳廷均有跋冊首

高宗御筆神乎技矣四字又以褻冊副紙瑩潔仿雲林畫  
二幅 題詩於冊首冊凡十四幅古錦護帙素綾裹幅  
上有董邦達水墨山水冊末幅張若靄畫梅石冊中

題詩數千百言詠雪喜晴每歲拈吟寄興多書諸冊並  
附臣工諸跋

此帖自金元已入御府王穉登跋朱太傅所藏二王眞  
蹟共十四卷惟右軍快雪大令送梨二帖乃是手墨餘

皆雙鉤廓填耳咸豐元年七月二十四日 賜南書房

翰林同觀墨蹟並 命臣 寫藻賦七言古詩一篇曷勝

榮幸之至謹記

題松雪十札墨搨

石家梅竹妙如何也抵山陰道士驚碧盞香環都愛惜多情真是趙鷗波

君家落水有蘭亭筆法精神得暮齡恨不相從飛棹去嚴灘爲乞水仙靈

由昆明湖泛舟過金鼇玉竦橋

召對鑑遠堂退直恭紀

藕香榭外水天秋仙侶從容許泛舟是日樞廷同直麟梅谷尚書魁邵又村侍

郎燦穆清  
軒光祿蔭  
金勒不須煩控騎  
銀河元自傍牽牛  
煙波浩渺  
嵐光接樓閣  
參差樹色浮

召對歸來移畫舫  
忘機真欲逐沙鷗

仲秋送三兄歸里二首

春來秋去只尋常  
一笑真成社燕忙  
兄近得句云作客無心隨社燕還家似欲

問耕危坐吟詩忘作客  
對牀聽雨卽還鄉  
亦知兄弟難爲

別差幸田園未就荒  
樓北祠堂新灑掃  
晴窗冬日好焚香

吾家支祠  
今年落成

楚粵烽煙苦未銷  
此身何計伴漁樵  
十年京國成衰鬢  
八月江城有怒潮  
問夜坐看星耿耿  
驚寒心逐鴈迢迢  
黃華老圃如相憶  
更約重來慰寂寥

香山直廬次彭詠我

蘊章

少司空韻

秋林絢爛嶺雲開曾見三班九老來

乾隆三十六年

賜

蓋以文職武職致仕老臣各九人爲三班君曾祖尙書公時以兵部侍郎致仕爲九老之一

香案詞臣

感先澤樞垣履跡接中台欣陪傑直簪豪侶每羨登高作賦才  
并載書齋慙後輩白頭吟望重低徊

謹案乾隆辛卯恭逢

皇太后八旬萬壽

賜三班九老宴遊香山畫院艾啟蒙繪圖文職九老顯親  
王衍璜恒親王崇志大學士劉統勲協辦大學士官保  
吏部尙書託庸戶部尙書素爾訥刑部尙書楊廷璋刑  
部侍郎吳紹詩工部侍郎三和武職九老都統四格曹

瑞散秩大臣國多歡散秩大臣銜甘都副都統伊崧阿  
薩哈岱李生輝富僧阿色瑞察致仕九老刑部尚書銜  
錢陳羣內大臣福祿禮部尚書陳惠華兵部侍郎彭啟  
豐禮部侍郎銜鄒一桂副都御史呂熾內閣學士陸宗  
楷詹事陳浩國子監司業銜王世芳

詠莪先生宿靜默寺見贈次韵奉荅

玉竦橋西雙板扉移家恰喜雪霏微芳鄰到處追隨共頃

寓 御河橋

西與君比鄰舊兩年來唱和稀杜老每懷軍國計陶公閒

看岫雲飛敝門忽得新詩句把卷渾忘退食歸

附錄元作

古寺幽深靜掩扉撲窗風力夜來微藥鑪酒盞居相伴

竹徑苔門客到稀  
曉霧霑衣螢火暗  
寒雲披絮雪花飛  
金鼇退食芳鄰卜  
計日移家便似歸

十月十九日

恩賜貂冠恭紀

一朵紅雲出紫微  
彈冠

恩許近光暉  
戴山敢效靈鼇抃捧

日先瞻彩鳳飛

前一日殿頌

恩詔

太和煥帶鑪煙籠

御案晴分砌雪點朝衣

冬日例服緣貂朝衣

天顏咫尺心彌凜  
下拜還思辨等威

得六弟金陵書感寄二首

癸丑正月

恩重慙

君父時危念弟兄大江何浩渺劇盜且縱橫汝在書猶達  
吾衰命亦輕挑鐙翫手札便恐畢平生

少日同憂患中年各奮飛遭逢殊不料時事乃多違報

國心仍壯思親泪暗揮何由見顏色夢寐或相依

哭六弟幼章三首

咸豐三年正月三十日弟以金陵  
守城歿血殞命二月初十日省城

遂  
昭

昨作兩篇詩揮泪寄吾弟賊氛蔽大江不知何路遞連日  
見軍報芴皇無所底初云汝登陴歐血已病瘠繼云病不  
支銜恨隕官邸余時直樞垣疏下不能啟欲讀恐失聲欲  
哭懼非禮慘愴合寮案憫惜動

宸陛



手詔鑒丹忱

硃批督臣摺尾

溫語慰同體

恩重命轉輕志苦甘如齋九頓出

丹墀感深惟雪涕

金陵石頭城城大守匪易吾弟氣素豪艱險曾不避武昌

捍水蓄勞心爲撫字

賑事竣超遷廣東運使旋擢臬司

粵東辦劇賊更拜

長纓

賜以清遠英德勦賊淨盡中丞葉公保奏

恩賞花翎

屏藩莅江左安集先河次湖

南調任江藩

欽使尚書杜公奏派南河辦賑事竣還任兩省城已戒嚴矣

履任未煖席楚氛

已荐至巖巖制府公抵掌運才智提兵扼九江庫藏悉羅

致神礮五百餘盡數充武備

上海購礮六百尊僅以四十留備守城

京帑六

十萬併取毋遺置

部議三十萬給軍三十萬守城督帥悉檄取之

遺之以危城置

之於死地弟曰謹受命空拳奮攘臂爰集諸紳民慷慨陳

大義首嚴遷徙禁先以眷屬示捐貲峙糗糧練勇除戎器

甘苦與眾共賞罰無偏恣而月規模成力竭神已頓中丞

尙虛懷

制軍出省中丞奉命莅此

將軍實同志

將軍名祥厚副都統名霍隆武金陵城陷

力戰死之長城信足倚黽勉望臺帥

臺帥軍上游初議豈不壯舳艫亘千里江皖賴保障前茅

甫遇賊一戰總戎喪翩然乃退飛踉蹌奔兵仗匿迹歸白

門譁聲撼青嶂僉曰帥餌賊吾民復奚望城中十萬戶湍

決各奔放大府方閉閣猜嫌仍未忘中丞又徑去力挽不

同頽哀哉一腔血噴灑何所向將軍率同寮抗疏陳其狀

誓與城存亾

天容亦悽愴赫然責失律

申命易大將忠魂竟不待骸骨委幽曠追思債事繇後懦

而前亢若使謀乃進據險審所當縱退時猶紆援軍勢可

仰時向軍門自湖北統巖城民氣固內外力足抗弟借帑

糧練勇布置周密民不驚徙若前軍徐退小孤東此錯竟

誰鑄此災實无妄鯨鯢遂窟穴烽火助波浪全家更何有

定付江魚葬夢中吾弟在告別色惆悵痛哭向南天何時

見滌盪

再哭六弟

是年六月 上以臣弟宿藻歿於王事

特旨加恩照藩司軍營病故例加等

賜

郵部議加贈右都御史子三

品廕生世倌以知州註冊

平生耽詩句憂樂常在口自從軍興來諷詠亦云偶又聞  
吾弟喪如失左右手仲春一擲筆今已六月後填膺萬斛  
淚心血不忍歐今日斯何日悲感到親友

九重恩詔下軫念嬰城守宿也歿王事臣力竭已久楚粵  
有微勞

卹典特從厚部臣議加贈豸服褻居首延

賞及厥嗣亦得縮印綬大哉

生成德名立死不朽微軀感同氣

溫綸奉左右伏地涕雨零

殊施恐虛負臣弟幸有子今尙在田畝去冬世佶以考廕  
來京試畢歸里

全家飼豺虎一簣存培塿奴僕偶生還羸病委奔走似聞

骸骨收荒榛瘞沙阜男兒馬革裹志不死戶牖死者長已  
矣生者餘衰醜曩曩千官裏已作獨行叟天高江海濶銜  
慟醉杯酒詩成手自焚魂兮歸來否

流螢

窗北疏簾竹亂垂流螢終夜傍階墀漫云腐草無知識風  
雨蕭蕭總不移

自題待漏圖

傑直樞垣十二載徵兵籌餉日紛紛盟心祇有廉泉飲造  
膝元無諫草焚時事艱危餘涕淚簡編功過付傳聞夢回  
漏箭聲聲急似聽江邊斷鴈羣

送族孫履機還里

送汝還鄉里初寒十月天遙將兩行泪寄與老兄前陳力  
吾衰矣思親獨黯然旌旗滿南國何日掃烽煙

題棣懷圖

沈侯惜我顏憔悴貌作豐頤方下人空有寒花仍對影豈  
知夜雨獨傷神桑間十畝歸無計天外三山夢不眞留與  
子孫好藏弄一回展卷一酸辛

癸丑除夕再題待漏圖

一著貂裘四十年而今鬚髮兩蕭然迴思走筆風檐下

余

五歲以待漏院詩受知於學使陳雪香先生

可似摳衣玉漏前老去短檠空對

影古來高閣自凌煙干戈未息心猶壯敢問桑麻杜曲田

題詠莪少司馬癸丑歲詩稿三首

獻納論思有性情體裁風雅氣和平皋夔自是廣颺侶誰  
識卿雲向日誠

歲莫懷人亦有由感時歎逝那能休若非杜老吟同谷定  
是張公詠四愁

雀鼠谷鄰汾水陰闔閭城接大江深天涯一種思鄉夢南  
北相望共此心

御賜學古有獲以勤爲本額書感

恩恭紀

咸豐四年春孟陬癸亥日

帝謂王大臣其祇領

御筆彩箋燦五色

寶墨光如漆四字寓

訓誠義取經史質拜

賜十三人諸王及樞密

微臣

荷殊榮感悚難具述學古乃

有獲傳巖思良弼政以勤爲本亦如學時術兩幀邀

天題捧觀

神采溢樗庸忝

禁近疊躋清要秩

南齋染柔翰

三天窺祕帙何期一席儒垂老侍

溫室島夷患未除憤激何時畢粵寇復跳梁南北數奔軼

仰貽



宵旰憂每恨師失律比年司度支軍餉何從出豈無飢溺  
懷民困未由恤屢欲自劾去時危忍求逸所思惟致身所  
職在造膝包容

主恩厚幸免卽罷黜迂愚久無補千慮未得一汲古乏修  
綆循名媿責實恐負平生學守道有差失惟此運甓志書

楹時自怵

習勤朝運甓省過夜焚  
香臥居室自書楹聯

天語誨諄諄驪珠照蓬華餘生勉策勵庶以保終吉

送三姪世齡歸里

患難難爲別重來未可知關山新戰後風雪早春時送汝  
頻揮淚還家且寄詩吾衰休更念萬國正瘡痍

寄輓祝蘅畦宗伯同年

同譜君知我論交冊載中解頤匡鼎說排難魯連風清白  
傳諸子光黃老此翁何由重把晤揮涕望長空

憶奉衰親日艱難仗友生豈惟貧病恤直取肺肝傾老去  
恒憂國書來尙議兵不才媿無補何以慰交情

三月三日見屋後桃花感作

屋後桃花紅半妝三株連理一株傷低枝偃蹇將垂地細  
葉離披尙覆牆不道園林春去速可堪風雨夜來狂回思  
爛漫繽紛處欲問仙津路渺茫

詠莪少司馬以近作見示賦荅

吟興今年勝去年春來退食已成編都將憂國深沈思付  
與長言詠歎篇漫叟襟懷多寄託香山樂府總流傳感君

得句頻投贈白首相期志益堅

先大夫忌日感述

三月二十五日

自吾父見背今已四十年見年六十二廿載違墓田感戀  
朝廷恩時事值連邇

綸扉預機務農部籌貨泉粵賊日猖獗三載兵戈連楚吳  
遶皖豫擾及吾鄉關復越上黨脊直犯析木躔藩王秉天  
弧萬馬馳風煙大帥執金鼓禁旅何闐闐遂驅狐兔輩南  
竄至河間阜城一小邑如魚待釜煎而彼鬼蜮徒渡河歛  
來援連陷山東邑其勢更蔓延官軍豈不衆分之則力單  
幸已扼其吭且聚而殲旃

皇仁拯民命發帑萬億千正供苦不足獎勵及輸捐數聞

哀痛

詔感奮涕泗漣計臣媿無術搜羅力已殫籌饒則病民饒  
缺兵散漫外間仰內儲盈廷責當官當官屢上疏披瀝呈  
肺肝明知無兩全得不救目前勞怨不遑恤憂憤相糾纏  
人窮則返本疾痛則呼天哀哀吾父母生兒欲象賢貽之  
以清白試之以險艱有弟已盡瘁以身捍民患白門歐血  
地流涕盈市闐魂魄猶殺賊骸骨何時還兄老多疾病百  
憂無一歡每恐忝所生常思保歲寒生離且死別焉用身  
獨完丈夫老益壯豈為兒女牽生逢

堯舜主誓欲格苗頑今日是何日淚下紛汎瀾不歎歲月  
逾但恨才力孱陳力不知止濟時良獨難乃知古人心史

乘難具傳覩縷寫衷曲窗外春風顛

再題憶松圖

聞道家園手植松舊游履跡碧苔封支離不改風霜勁長  
養都憑雨露濃老去鳳鸞仍作伴春歸桃李若爲容偃佺  
相遇應惆悵曾歷蓬山一萬重

男世長姪孫友直謹校字